



Reglement for TT-ordninga i Vestfold og Telemark

Vedtatt av fylkestinget 15.12.2020, sak 165/20.

1. TT-ordninga

TT-ordninga er eit transporttilbod lagt til rette for personer med sterk og varig funksjonsevne (fysisk og/eller psykisk), og som på grunn av dette ikkje kan nytte seg av ordinær kollektivtransport til fritidsaktivitetar.

TT-ordninga er meint å dekke fritidsreiser. Reiser til og frå arbeid- og utdanningstilbod, lege, sjukehus eller anna behandlingstilbod er dekt av andre stønadsordningar.

TT-ordninga er eit fylkeskommunalt tilbod som ikkje er lovpålagt.

2. Vilkår for å bli godkjent som brukar

For å bli godkjent som brukar må søkaren oppfylle følgande vilkår:

- a) Søkaren må ha sterk nedsett funksjonsevne som er varig eller har vart meir enn 3 år.
- b) Helsetilstanden må dokumenterast med legeerklæring.
- c) Søkaren må vere minst 10 år.
- d) Søkaren må vere ute av stand til å nytte seg av ordinær kollektivtransport, også bestillingstransport. Lang avstand til haldeplass, eller manglande/ikkje-tilfredsstillande kollektivtilbod blir ikkje vektlagt ved vurdering av søknaden.
- e) Søkaren må ha folkeregistrert bustad i fylket.
- f) Søkaren kan ikkje ha bustad på institusjon/buform med omsorg og pleie heile døgnet.
- g) Søkaren kan ikkje ha trygdefinansiert bil.
- h) Søkaren må vere ute av stand til å køyre bil.

3. Søknad og behandling

Søkar må nytte standardisert søknadskjema og legeerklæringsskjema. Utfylt søknadskjema og legeerklæringsskjema skal signerast og sendast bustadkommunen.

Bustadkommunen førebur saka og innstiller på om søkar er godkjent/ikkje er godkjent som brukar. Bustadskommunen sender dette til Vestfold og Telemark fylkeskommune som behandlar søknaden og fattar vedtak i saka.

Søkar finn søknadsskjema, legeerklæringsskjema og informasjon om TT-ordninga på Vestfold og Telemark fylkeskommune sine heimesider.

Legeerklæringa må ikkje vere eldre enn 6 månader. Det er søkaren sitt ansvar at søknaden inneheld korrekte opplysningar og er godt nok dokumentert.

4. Godkjenningssperiode

Eit vedtak om brukargodkjenning varer i 5 år. Før godkjenningssperioden er over kan brukaren søke om fornya godkjenning ved å sende nytt søknadsskjema med ny legeerklæring, men brukarar med permanent funksjonsnedsetting skal sleppe å fornye si godkjenning kvart 5. år.

5. TT-kort og reisetilskot

Godkjente brukarar får tildelt eit elektronisk TT-kort frå fylkeskommunen sin kortleverandør. TT-kortet er gyldig så lenge brukaren er tilknytt ordninga. TT-kortet er personleg og kan ikkje bli overdrege eller nytta av andre.

Fylkeskommunen fyller opp TT-kortet med reisetilskot to gonger per år med halvparten av tildelt årleg reisetilskot, høvesvis 1. januar og 1. juli. For nye søkarar som får innvilga brukargodkjenning i 1. eller 3. kvartal, blir TT-kortet fylt med reisetilskot tilsvarande ein fjerdedel av tildelt årleg reisetilskot, høvesvis 1. april og 1. oktober.

Dersom brukaren ikkje har nytta heile det årlege tildelte reisetilskotet innan 31. desember, blir det reisetilskotet som er att sletta når kortet blir fylt på nytt 1. januar.

Fylkeskommunen fastset reisetilskot og minstebeløpet på eigenandelen. Det er sist vedtatt reisetilskot og eigenandel som gjeld til ei kvar tid.

Ved tap av TT-kort må eigar av TT-kortet melde frå til kortleverandøren eller fylkeskommunen med ein gong slik at kortet kan sperrast. Det kan ein gjere ved å:

- Kontakte kortleverandøren per telefon
- Kontakte Vestfold og Telemark fylkeskommune på telefon 35 91 70 00
- Sende epost til post@vtfk.no

Utskriving av TT-kortet er gratis for brukaren første gongen. Ved utskrivning av nye TT-kort kan brukaren måtte betale for dei faktiske kostnadene.

6. Brukargrupper

Godkjente brukarar blir delt inn i brukargrupper.

Gruppe 1: Søkar med sterk og varig nedsett funksjonsevne (fysisk og/eller psykisk).

Gruppe 2: Søkar som er permanent rullestolbrukar, eller som er blind eller sterkt svaksynt.

7. Transporttilbodet og eigenandel

TT-kortet kan nyttast i Vestfold og Telemark fylke. TT-kortet kan også brukast i andre fylke dersom transportøren har avtale med kortleverandøren. Reiser kan bestillast av drosje, turvogn eller spesialbil som har teknisk utstyr som kan lese og registrere TT-kortet, eksempelvis eit taksameter.

Ved kvar reise skal brukaren betale ein eigenandel som TT-kortet ikkje dekker. Brukaren kan sjølv velje å betale ein eigenandel som er høgare enn minstebeløpet på eigenandelen. Det er den resterande turkostnaden som blir belasta på TT-kortet.

Brukarar som har «ledsagerbevis», kan ha med reisefølge som reiser gratis. Reisefølge må møte opp der brukaren blir henta og følge med fram til reisemålet.

8. Klage på enkeltvedtak

Når ein søknad om TT-kort er behandla kan enkeltvedtaka klagast på. Det kan klagast over at ein ikkje har blitt godkjent som brukar, eventuelt brukargruppa ein er plassert i. Det kan ikkje klagast over dei satsar som til ei kvar tid er fastsett for dei ulike brukargruppene (storleiken på reisetilskotet). Klaga skal vere skriftleg og bør grunngjevast. Klagefristen er tre veker frå den dagen søkar har mottatt vedtaket.

Klageinstansen er Særskilt klagenemnd i Vestfold og Telemark fylkeskommune. Klage kan sendast til Vestfold og Telemark fylkeskommune, Postboks 2844, 3702 Skien eller på e-post til post@vtfk.no.

9. Tilgang til å endre og avslutte

Fylkeskommunen kan gjere endringar i reglementet med direkte innverknad på vedtaket den enkelte brukar har fått, og dermed brukaren sine rettar og plikter undervegs i godkjenningsperioden. Dette gjeld blant anna endringar i vilkår for brukargodkjenning, godkjenningsperiode, brukargrupper, omfanget av tilbodet og anna. Endringa vil få verknad frå det tidspunktet endringa blir vedtatt.

Brukaren skal melde frå til fylkeskommunen om forhold som endrar grunnlaget for brukargodkjenning, i samsvar med vilkåra i punkt 2 i dette reglementet.

Tilbodet opphøyrer dersom brukaren ikkje lenger er omfatta av ordninga, eller dersom TT-kortet ikkje har vore nytta i løpet av ein 2 års periode.

10. Misbruk

Fylkeskommunen kan tilbakekalle brukergodkjenning og TT-kort ved misbruk av TT-ordninga. Som misbruk reknast at andre enn brukaren nyttar TT-kortet, at urette opplysninger blir gjeve ved søknad om TT-kort, eller at brukaren på andre måtar ikkje overheld dei plikter som følger av dette reglementet.

Ved misbruk kan fylkeskommunen også kreve erstatning for eventuelle økonomiske tap.

11. Virkningstidspunkt

Dette reglementet gjeld frå 01.01.2021. Frå same dato opphøyrer «Reglement – Transportordningen for funksjonshemmede» vedtatt av fylkestinget i Vestfold 12.12.2013 og «Retningslinjer for tilrettelagt transportordning (tt-ordningen) i Telemark» vedtatt av hovedutvalg for infrastruktur 22.03.2011.